

ARKIB : 09/11/2011

[http://www.utusan.com.my/utusan/info.asp?y=2011&dt=1109&pub=Utusan\\_Malaysia&sec=Timur&pg=wt\\_03.htm](http://www.utusan.com.my/utusan/info.asp?y=2011&dt=1109&pub=Utusan_Malaysia&sec=Timur&pg=wt_03.htm)

## Konvensyen Hospital Mesra Ibadah



SEBAHAGIAN peserta di Konvensyen Kebangsaan Hospital Mesra Ibadah Kali ke-3 anjuran Hospital Universiti Sains Malaysia (HUSM) di Kota Bharu, baru-baru ini.

KOTA BHARU 8 Nov. - Lebih 250 peserta dari 10 negara menghadiri Konvensyen Kebangsaan Hospital Mesra Ibadah Kali ke-3 anjuran Hospital Universiti Sains Malaysia (HUSM) selama dua hari pada 16 dan 17 Oktober lalu.

Konvensyen bertemakan 'Amalan Perubatan Semasa - Satu Muhasabah' yang bertujuan mengupas isu-isu relevan berkaitan perubatan berlandaskan prinsip Islam itu menyaksikan pembentangan daripada pelbagai pakar rujuk agama dan perubatan.

Pengarah HUSM, Datuk Dr Zaidun Kamari berkata, pelaksanaan konsep Hospital Mesra Ibadah (HMI) yang dipelopori unit Hal Ehwal Islam hospital tersebut sejak 2001 bukanlah sesuatu yang boleh direalisasikan dengan mudah sekiranya tiada iltizam tinggi daripada semua pihak.

Katanya, konsep HMI tidak memfokus kepada kemudahan melaksanakan ibadah solat semata-mata tetapi merangkumi kesemua aspek termasuk rawatan, ubat-ubatan dan juga penerapan nilai murni serta paparan akhlak baik di kalangan kakitangan.

"Setelah sekian lama ia dilaksanakan dan menjadi contoh kepada hospital kerajaan serta hospital swasta lain, kita perlu melihat kepada usaha penambahbaikan agar konsep ini terus berkembang.

"HUSM merancang mendokumentasikan kejayaan yang dicapai menerusi konsep HMI setakat ini supaya ia dapat menjadi prosedur operasi standard (SOP) yang boleh diikuti semua pihak," katanya kepada pemberita di sini baru-baru ini.

Beliau berkata, konvensyen yang sama akan dianjurkan lagi tahun hadapan bagi memberi peluang kepada lebih ramai peserta dan pembentangan kertas kerja.

Antara penceramah yang hadir adalah Mufti Perlis, Dr. Juanda Jaya; pengamal perubatan terkemuka, Dr. Danial Zainal Abidin; pensyarah Kolej Islam Antarabangsa Sultan Ismail Petra (Kias), Dr. Abdul Basit Abdul Rahman dan pensyarah Universiti Malaya (UM) yang membuat kajian mengenai solat iaitu Prof Madya Dr. Fatimah Ibrahim.

Sementara itu, bekas Pengarah HUSM, Prof. Datuk Dr. Kamaruzaman Wan Su berkata, pengurusan hospital yang berazam untuk menerapkan nilai Islam dalam perjalanan hospital mereka tidak harus takut dengan persepsi negatif orang lain.

Dr. Kamaruzaman yang merupakan antara penggerak utama amalan pemakaian menutup aurat jururawat HUSM pada peringkat awal penubuhannya dahulu berkata, persepsi negatif biasanya datang daripada orang Islam sendiri yang tidak yakin dengan peraturan ditetapkan agama.